


Oeise Lade 3-2014, p. 32

In salid *rumantsch*

Tgi ch'ha legì quest titel ha già la sgarschur. Pulir confettis, quei è in horror. Bun, sche ils confettis èn sin via, lura è quai anc ina chaussa. Lura vegn la maschina dals stradins e net-tegia tut cun quels barschuns gronds. Ma confettis a chasa. Oh na!

Ma pertge in summa confettis a chasa? Quels che fan gugent carnaval san: sche insatgi bitta confettis sin tai u anc mender: sche insatgi metta confettis denter tes pullover e tia pel, lura has ti pers. Lura è suenter tut la chasa u tut l'abitaziun plaina da confettis. Pos provar anc uschia bain da squassar ora tut avant che entrar a chasa. Emblida!



Pulir
Confettis

Era ina situaziun pauc agreabla è quella: Tar il Chalandamarz en la vischnanca da Ftan en Engiadina Bassa datti in cortegi da las mascras (il Chalandamarz è in pau auter a Ftan). E durant quel cortegi vegn bittà confettis dapertut. Sche insatgi avra per exempel la fanestra per guardar – zack – e duas, trais mascras bittan confettis tant co ch'i pon en chasa. Sche insatgi passa gist cun ses auto e sto fermar pervia dal cortegi – zack – e l'auto è plain confettis. Propi plain. Ils davos da quels confettis chattas ti lura sche tut va bain la fin da la stad anc adina en tes auto u en chasa. Gea, quels confettis èn diabolics. Sche insatgi avess propi da far ina giada in examen da pulir, lura stuess'ins metter in pau confettis. Sche quels èn propi tuts davent, lura datti in da 6.



David Spinnler